

欽定天文正義

欽定天文正義卷十一

月占

月令

史記天官書月行中道安寧和平陰間多水陰事外北三尺陰星北三尺太陰大水兵陽間驕恣陽星多暴獄太陽大旱喪也索隱案中道房室星之中間也房有四星若人之房三間有四表然故曰房南為陽間北為陰間則中道房星之中間也故房是日月五星之常行道然黃道亦經房星若月行得中道故陰陽和平若行陰間多陰事則人主驕恣若歷陰星陽星之南迫太陰太陽之道則有大水若兵及大旱若喪也太陽亦在陽間之南各三尺也太陰太陽皆道也月行近之故有水旱兵喪也

按史記天官書月行有中道陰間陰星太陰陽間陽星太陽陰星太陰皆北三尺陽星太陽不言尺索隱為中道為房室星之中間房有四星若人之房三間有四表然南為陽間北為陰間月行得中道故陰陽和平陰間多陰事陽間則驕恣若厯陰星陽星之南迫太陰太陽之道則有大水若兵及大旱若喪太陽亦在陽間之南各三尺今按天文家以一尺為一度蓋據人目所視而言日月在天全徑約皆半度視之有若五寸是也以月道考之古厯月道出出黃道南北各六度則太陰在中道北六尺為月行極北之道太陽在中道南六尺為月行極南之道索隱謂厯陰

星陽星之南迫太陰太陽之道當時歷陰星之北陽星之南脫之北二字也又以星度考之房室四星相距約各三度則所謂各三尺者是已但最北一星在黃道北一度三分中間北一星在黃道南一度五十七分中間南一星在黃道南五度二十六分最南一星在黃道南八度三十三分是中道不在房星中間而在陰間月行北道能至陰星之北月行南道不能至陽星之南則天官書于陽星太陽不言尺者或為對待之文而非寔有其事索隱謂太陽亦在陽間之南各三尺者亦第據文義云然而非寔有考證也又以交行考之月道與黃道斜交其入黃道北之點為

正交猶日道之春分也入黃道南之點為中交猶日道之

秋分也然日道與赤道交有定位在而月道與黃道之交

無定所每年退行十九度有奇約以二百三十月有奇周

而復始今房宿距星在昴宮二十九度

恒星有歲差每歲東行五十一秒

隆丙寅年房宿第一星在昴宮正交自寅宮二十一度退行

至卯宮十七度此三十四度內計二十一月有奇月皆行

房宿陰間正交自卯宮十七度退行至申宮十二度此一

百五十五度內計九十九月有奇月皆行房宿陰星北至

於太陰正交自申宮十二度退行至酉宮八度此三十四

度內計二十一月有奇月復行房宿陰間正交自酉宮八

度退行至寅宮二十一度此一百三十七度內計八十七
月有奇月皆行房宿中間南至陽間是十九年之內月離
房宿南北各有時未必^即實有水旱兵喪之事蓋自北齊張
子信以前未知交道有行度又以房宿為農事之候故月
行或南或北皆以為占然其曰水曰旱則亦取乎陰陽之
義也今東北郡人相傳十一月下旬候月離房宿南北占
來歲水旱又於十二月下旬月離房宿時候風占霜早晚
視雲氣占五穀所宜或者即天官遺意也

漢書天文志月有九行者黑道二出黃道北赤道二出黃道
南白道二出黃道西青道二出黃道東立春春分月東徙青

道立秋秋分西從北道立冬冬至北從黑道立夏夏至南從赤道然用之一決房中道青赤出陽道白黑出陰道若月失節度而妄行出陽道則旱風出陽道則陰雨

按漢書天文志云月失節度而妄行出陽道則旱風出陰道則陰雨今以月緯考之正交入陰厯行黃道北中交入陽厯行黃道南距交近則南北行疾距交遠則南北行緩驗之交食凌犯皆無違失則是月之南北有常行不得有失度者蓋自唐李淳風始言月行白道道有交行前此以八節分九道其疎故未能與月行密合其失原不在月然其曰旱風曰陰雨則亦猶是史記陰陽之義也

漢書五行志京房易傳曰晦而月見西方謂之朏朔而月見東方謂之仄隱仄隱則侯王其肅朏則侯王其舒

按漢書五行志云晦而月見西方謂之朏朔而月見東方謂之反隱天文諸家則凡月行之朏朏弦望日時晦朔隱見之早遲以及月鉤升降之仰偃皆有占今以日月行度考之日行有盈縮月行有遲疾日行縮而月疾則弦望必早矣日行盈而月行遲則弦望必遲矣又黃道升降有斜正月行緯度有南北黃道正升正降而月行緯北則月必朔後早見晦前遲隱矣黃道斜升斜降而月行緯南則必朔後遲見晦前早隱矣正升正降者月鉤皆仰而向上

斜升斜降者朔後斜向東南晦前斜向西南斜之甚而幾
平者則橫而向正南獨無正偃向下橫斜向北者蓋朔後
晦前日在月下光不得在上也日在月北光不得在南也
詳見考成上編漢代以前未知日月有盈縮遲疾之差概以二十
九日半有奇四分之為晦朔弦望之率往往差至二日
有奇故月見西方已是朔後謂晦而月見西方者非月行
之失速乃所謂者遲也月見東方尚是晦前謂朔而月見
東方者非月行之失遲乃所謂朔者早也天文家不知其
為推步之踈轉以此為月行之過拘牽傳會不可勝言史
志所載特其較著者也故叙錄史文而附論于其後至於

占驗則惟取暈適抱珥雲氣變色等類著於編其他盈縮遠近理~~復~~有而日循其常與夫正偃反月之屬_{望前西方朔見東方之類也}望後東缺謂之反月亦晦見名益恆而寔無是理者皆概置不錄云

晉書天文志月為太陰之精以之配日女主之象以之比德刑罰之義列之朝廷諸侯大臣之類月變色將有殃月晝明姦邪並作君臣爭明陰國兵強中國飢天下謀僭月生齒天子有賊臣羣下自相殘

宋史天文志月變色為殃青飢赤兵旱黃喜黑水月生齒則下有叛臣生足則后族專政

觀象玩占月變色其國有殃青為憂為飢赤為爭為兵白為
喪為旱黑為水為疫疾為死喪黃潤而明則有喜黃燥為風
為旱月始生而色青其分有疾五穀貴色赤其君分憂色
黃其分有立王色白其分亡地色黑其分有水月滿而色赤
為兵為旱月赤如赭大將死野兩軍相當月生而色黃主人
受其殃月二十八日色黃客受殃月無光臣作亂其下國
有死王一日君令不行民飢國憂正月月無光兵起人多死
二月月無光國有災變事三月月無光水災四月月無光大
旱五月月無光有火災六月月無光六畜貴七月月無光蟲
災歲凶八月月無光兵起九月月無光布帛貴十月月無光

六畜貴十一月月無光魚鹽大貴十二月月無光五穀大貴
月光如張炬火其下國立王 月生三日其中變縵縵如絲
布狀其野餘兵盡出在外主人不勝 月闕其下有血流凡
丙月三月以至十月以皆有物如月非昏真月也 月中有
如人行者有兩主爭客勝 月望而月中蟾兔不見者所宿
國大水城陷民流亦為女主宮中不安 月生彗其國昏亂
月生芒后族擅權天子有憂 又占軍在外者取向北北軍
敗向南南軍敗東西亦如之若有氣出用兵者當隨其氣所
向攻之勝一曰月垂芒其國亂月上有黃芒皇后有喜月生
角天下兵起國受殃月上角大主勝下角大賊勝月生牙齒

荊州占曰王者備左右一曰有刺客月生足其下軍憂月生
赤足臣有得罪者月生爪有刺客在其分荊州占曰月爪所
指其方頗擾有土功事月生兵起備不虞有奸人用兵無功
月生刺其宿國君防刺客若有兵在外則將防之常以月十
四夜候月中有氣如鳥飛其地無居者月中有黑子黑氣大
如桃李臣有蔽主明者月薄女主憂大臣失所志曰凡軍
行而過日月薄宜收軍不遇有謀反無而蝕文曰薄或近望陰
氣侵迫赤黃無光者慝氣薄月也月無雲而波影晦暗
謂之夜冥法令不行將有死亡之兆若雜以殺氣寒慘者必
有大咎三日內雨則不占月中有神龍玉兔忽神龍倚玉

鬼者洪水滔天人民流散千里荒涼國亂連年不止

月旁雲氣占

隨書天文志月暈黃色將軍益祿祿得位月暈有兩珥白虹貫之天下大戰月暈而珥兵從珥攻擊者利月暈有蜺雲乘之以戰從蜺所往者大勝月暈虹蜺直指暈者至月者破軍殺將

宋史天文志月旁瑞氣一珥五穀登兩珥外兵勝四珥及生戴氣君喜國安終歲不暈天下偃兵白暈貫月下有廢主白虹貫之為大兵起月珥背暈暈而珥六十日兵起珥青暈赤兵白喪黑國亡黃喜有斡珥臣下弛縱欲相殘賊不和之氣

暈三重兵起四重國亡五重女主憂六重國失政七重下易
主八重亡國九重兵起亡地十重天下更始

月暈大微垣天子以兵自衛一月三暈有赦月暈角其分兵
起右角右將災左亦然或曰主水色黃有大赦月暈三重入
天門及兩角兵起將失利月暈亢其分先起兵者勝在冬大
人憂月暈氐大將凶人疫在冬為水主危以赦解之月暈房
為兵三宿主赦及五舍不出百日赦月暈心為旱穀貴蟲生
將凶月暈尾有疫大赦將相憂其分有水災后妃憂月暈箕
為風穀貴大將易又王者納后月暈斗大將死穀不生月暈
牛在冬三月百四十日外有杜赦暈中央大星大將被戮月

暈女有兵謀不成月暈虛有兵謀風起則不成又為民飢月
暈危有兵喪先用兵者敗月暈室為水為風月暈璧為風雨
其公有憂月暈奎兵敗糴貴將戕人疾疫月暈婁在春百八
十日有赦又為糴貴三日內雨解之月暈胃兵先動者敗姤
婦多死又曰天多雨或山崩有破軍歲星在暈內天下有德
令月暈在四孟之月有赦然惑在暈中為兵月歲三暈鼎弓
弩貴民飢月暈畢兵亂飢喪量三重年邊有叛者七日內風雨
解之又為陰國有憂天下赦正月月暈紫有赦外軍不勝大
將憂偏裨有死者月暈參將死失人亡亂戰不利月暈井為旱
為兵為民流國有憂一曰國有赦陰陽不和則暈暈及三重

重在三月為大水在十二月日壬癸為大赦月暈見為旱為
赦月暈柳林苑有兵天下有土功厨獄官憂又為兵為飢為
旱疫月暈星其地旱獄官凶月暈張為水災陳卓曰五穀魚
鹽貴月暈軫有兵歲旱多大風觀象玩占月有戴不出
百日人主有喜氣且珥占同月有珥色青為憂白為喪赤
為兵黑為亡地黃為喜月有兩珥下國喜兵在外則勝月有
四珥其下國安有喜高宗占月十日有兩三珥其國有喜四
珥女主憂不則天子有立諸侯月昏而珥天下兵起不出六
十日荊州占月昏而珥有半喜月夜半而珥邊地有恐月有
白珥其下城降月冠而珥有大風人主有喜月有背珥

臣下縱放相殘天子宜備左右月有四疇不暈臣下有謀不成月有抱為順有背為逆抱且背為不和臣有欲為忠者亦有欲為邪者月有四提其下國有憂有六提天子遊行天下月始生有黑雲貫月名曰緇雲或一或二不出三月有暴雨月始出時有雲居其中狀如禽獸其名曰暴甲乙日見東方受其害丙丁日見南方受其害壬癸日見北方受其害月下有氣如人相隨是謂惡成其下國分侯王當之月下有氣如飛鳥其分無君月上有赤黑雲氣臨月當其地有亡軍青雲刺月是謂賊害主受其殃五穀不成青雲刺月是謂仇賊黃雲月刺月女主有憂白雲刺月其下君亡黑雲刺月是多陰

雨黑氣繞月女主災黑氣似暈圍月或射月皆為女主不安
七日内雨不占 月暈謂之逡巡人君之政和平則終歲不
暈天下又安月暈者臣下專權之象月暈則受侮及所在國
皆不安月暈七日無風雨則兵起土工興月暈赤而有光天
子起兵攻城城降月暈中赤外青羣臣親附外赤中青臣有
外心月暈闇者其國君背約月暈東向風敗五穀西向且雨
風害五穀北向為水南向者旱風月暈明王者自將兵 月
暈一重下缺不合上有冠戴旁有兩珥白雲連環貫珥國有
大兵大戰流血其地紛紜期不一年月暈在重有赤雲繞之
或如杵衡之有軍在外大戰萬人死其下月暈再重有背有

有反者背在內私成於內背在私成於外月暈三重其外赤而中濁不散者軍聚會曰月暈三重天下兵起土工與相死女主憂月暈三重赤雲貫之其下國亡月有交暈赤色有光其國不出三年被兵月色黃有交暈所宿國受兵月色黃白有交暈一黃一赤所宿國益地不出一年交暈貫月有軍相并從貫擊者勝殺將月暈如連環兵起爭地月暈連環一二至四五皆為女主昌月有白暈連環接北斗其國大兵大戰流血其下亡地曰月暈連環貫北斗魁大臣下獄流千里月暈而冠天子有喜多大風月暈而珥兵起戰從珥所擊勝曰大水有女喪月暈一珥得珥之國失地月暈兩

珥先起者勝月暈有白珥上將戰死月暈兩珥有白雲如虹
或白虹貫之天下有大戰以日宿占國月暈有抱珥在暈外
外人戰勝在內人勝月暈有璫臣叛兵起月暈一重下璫
上冠旁有珥兵起月暈有虹蜺乘之以戰從虹所往勝月暈
有虹蜺直指破暈至月破軍殺將月暈而有赤雲如火其地
圍城降月暈有白氣從外入攻城者勝從內出城中兵出勝
月暈有雲橫貫之起兵者勝一曰左右吏死月暈有雲如布
或三或四貫暈及月有兵從之未勿當之戰當之者必敗月
暈有白氣交橫貫月大將暴亡軍敗月暈有白雲如杵抵月
不出其年有女喪月暈有雲貫暈蔽月不出其年國有喪月

暈而陰亂風四起欲雨不雨士卒謀其將帥 月暈有流星
出暈中其國貴人走有流星入暈中臣走在外者遂月暈天
無雲有流星過月上下其國有喜月暈而橫流星橫度暈中
諸侯有亡國失地者亦曰其分有王侯之喪流星從月暈中
出其國有憂赤色有拔城黑色破軍月環暈有流星入之
外國有使來出之天子後宮得子孫流星色黃白明潤為
喜月暈有客星在月北北國勝在月南南國勝軍在外月暈
軍上光色鮮明者戰必勝 月以正月三日暈所宿國小熟
五日暈大熟二日暈有土功荊州占月以正月八日九日十
六日十八日夜有暈者其年三月有德令十一日夜暈大旱

十二日夜暈蜚蟲多死二十三日二十四日夜暈五穀不成
二十五日二十六日夜暈泉貴月止月上旬一暈樹木蟲二
暈禾穀蟲三暈雷振物武密占曰有大赦在明年五暈天下
更王六暈有亡國七暈八暈道路多死人一曰月正月三暈
民鬪歲惡月正月甲乙日暈人疾憂丙丁日暈旱戊己日暈
大水壬功起庚辛日暈大兵壬癸日有暈皆為大水荊州占
月一月三暈王者自將出行一月五暈至九暈其國亡地十
暈以上天下更改五月中月至九暈道上多熱死人月春暈
木日夏火日秋金日冬水日四季土日皆為其分有殃月
暈五星其國主死武密曰此謂五星相近而月暈盡及之也

凡月暈五星皆為兵。星色明客勝。不明主人勝。暈色明不明亦如之。月暈回木星大水傷五穀。一曰粟貴人相食。一曰兵起。一曰有赦。一曰有女憂。一曰其國主不安。月暈木星在辰有赦。令軍在外。月暈木星星色赤。主人戰敗。月暈木星而月食。天下飢。有大戰。月食木星而暈亦如之。月暈回火星。星所守國主亡。一曰兵在野大戰。無兵大旱。兵起。一曰客兵入境寇掠。月暈火星而又犯之。將軍以憂死。月暈火星而攝提在其中。天子之兵橫行天下。亂。月暈火星而食。其分國亡。月食火星而暈亦如之。又曰其下有破軍亡地。月暈回土星。其國有土工。巫咸曰旱。高宗占曰所在國兵起。戰不勝。月暈土

星在參五車有蔽月暈土星而食為兵喪其國土工與月食
土星而暈亦如之月暈金星其國受兵戰不勝一曰所宿國
兵起或曰為旱災月暈金星而月食有大兵戰一曰大將有
二心月食金星而暈亦如之月暈回水星所宿國有水災河
圖帝覽嬉曰月春夏暈水民病寒熱熱在秋冬憂兵起月暈
水星在角亢二重如連環大臣有謀月暈水星而食為大水
大饑月蝕水星而暈亦如之凡月春暈木夏暈火四季暈土
秋暈金冬暈水而其星色惡者皆為其分國亂大山凡月暈
五星諸占多以為凶而間有言吉者大抵觀象要在察色若
暈得玉色或五色相生鮮明潤澤而月與星皆不失常色光

明溫潤大小相承色不違時行不失次則為吉無疑若月光
昏昧星色異常進退舛差芒角極怒暈色枯燥刑克黯如
死灰則當以凶禍言之要在詳審而已 月暈天市垣兵起
又占月暈環天市房心貫索市有火天子宮中防火月暈回
大微翼軫少微三台女主大盛喜在後宮月暈回紫微垣門
至文昌有赦令 月暈角宮宿蟲多死一曰有兵先起者不
勝海中占曰民飢多風雨石氏曰月入角中而暈王者喜又
曰有大赦暈一角小赦甲乙日為春丙丁為夏庚辛日為秋
壬癸為冬又占月暈回角亢大將軍有憂月暈於亢有兵在
外八十日罷無兵後八十日兵起月以秋三月暈亢兵起大

戰水中大臣有死者。郝萌曰：有赦，再暈亢大水，雨民流千里。
郝萌曰：冬雷而水，十月月暈，亢兵起，民流，月暈于辰，人多病。
郝萌曰：有治道路事。一曰：水蟲多死，正月月暈辰，兵起，武密。
占曰：月與歲星同在辰而暈，有赦。令月暈房宿，郝萌曰：財寶
出，穀貴。荊州占曰：月暈團房，四方兵起，梟骨于野。又曰：其地
大疫，水蟲多死。月暈于心，石氏曰：有大戰，大水出，山崩谷塞。
一曰：有火災。荊州占曰：主憂，郝萌曰：月暈在心，三日不風，不
雨，有喪，有奇。令月以正，月暈心，雞不瀾，月暈心，三重赤雲貫
之，國有喪。魏侯王月，圍心暈中有赤雲，若白雲如杆，貫月大
人當之，有大兵起。月暈尾，其分益地。郝萌曰：歲不登，月暈心。

尾無骨及四足蟲為害麥貴月暈于箕五穀以風傷荊州
占曰大風發屋有坐口死者又曰北夷燕趙皆飢月暈于斗
人流千里郝萌曰大將牛馬大病陳卓曰大臣免大將為龍
五穀不成月暈箕斗兵從東北方來者勝從西南方來者
不勝月暈于牛小兒多死軍暴將死郝萌曰五穀不成荊州
占曰牛羊貴武客占有水災月暈于女婦女多死有大風起
石氏曰月暈圍女有兵進而不關一曰不占而降荊州占曰
布帛貴一曰民多去其居室絲綿貴又占月暈圍女牛女
工絲枲皆貴牛多暴死又曰有土工一曰宗臣黜否則冢宰
黜月暈於危郝萌曰民多病亡有兵謀不成河圖帝覽嬉曰

軍所止民多去其宅月暈營室婦人多病死天下有謀叛臣
起亂不成海中占兵起有屠城郁萌曰宮室敗月暈室壁風
起大水月暈於壁其分有兵海中占工役大興黃帝占軍在
外者敗巫咸曰賢士囚戮庫藏火災月暈于奎大臣多死荆
州占曰魯國兵大敗絮大貴武家曰其年有妖月暈于婁郁
萌曰大人憂難多死帛貴月暈婁在四五月有赦一曰等
相疑大臣黜宗臣救月暈婁畫圓三星有赦若木星在暈中
必有大赦兩軍相當而月暈婁軍俱解月暈于胃軍不戰而
歸一曰穀大貴巫咸曰倉廩有改令河圖帝覽嬉曰民多腹
疾貴臣死月暈于昂黃帝占曰天下大饑北夷為亂一曰

貴人多死有兵有暴令有流言者又曰大水穀不收人雜其鄉多病腹疾一曰畜多死巫咸曰鬼多死郁萌曰月暈昴一歲一暈小赦再暈中赦三暈大赦不出其年月暈于畢邊兵起一曰邊將囚一曰徵官黜月一歲三暈畢天下中外有兵有大赦又占月暈畢有風雨月暈于觜河圖帝覽嬉曰大將死弓弩貴一曰其分有叛者月暈參伐郁萌曰其國兵弱戰不勝荊州占其國客軍大恐月暈于井海中占曰胡兵起月暈井一重四夷不和月暈井及鬼其年旱禾不收月暈于鬼石氏曰泰貴一曰歲惡多霧雹霜雪多死人月以夏三月暈鬼多雨水有蟲災一暈為寒再暈小水三暈大水五穀

不成月暈于柳。郁萌曰：有獄事。又曰：穀貴，飛蟲多死。巫咸曰：月暈柳三重，大臣有死者，兵起不戰，有水災，民流徙。一曰：有赦。月暈于星，巫咸曰：大臣憂。一曰：有獄事。天文論：有小兵戰，蜚蟲多死。月暈于張，黃帝占：蜚鳥多死。郁萌曰：其地旱。月暈於翼，郁萌曰：大旱。有大風。黃帝占：士卒多遁走。荊州曰：占天下兵起，庫兵悉出。一曰：有軍。軍罷，巫咸曰：士卒大聚，有大戰。民去室宅，車馳馬走，貴人多死。京房曰：軍在外失偏將。天文論曰：多風霧。郁萌曰：月以二月暈翼，則五月有赦。月暈軫，宿黃帝占曰：大將戰死。郁萌曰：先起兵者不勝。武家占曰：大臣黜。一曰：諸侯盜兵，夷狄入境。月暈圓軫三重，戎狄滿野。月

暈軫及角大赦。月以二月暈軫及角五月大赦。月以正月
暈軫和萌曰大飢。公子死車貴。月以四月暈軫天子有德令
月以十二月暈軫內兵盡出有軍在外則罷。

天文會通。月暈大微廷。天子以兵自衛。一月三暈有赦。月暈
大微廷。周匝不啟門中有黑雲蔽覆者。天子有憂。一曰有喪。
月暈三重。周大微廷。王者憂。人臣有離心。月暈七重。周大微
王者憂。兵起禁衛。大臣有逆謀。月暈左右角。春甲乙日其野
有兵喪。火人當之。夏丙丁日女主干政。秋庚辛日人主憂有
兵。一曰國有內變。冬壬癸日其國水災毀城邑。歲數四季戊
己日其國興大役。下民勞怨。月暈亢開口。期五日有暴雨。月

暈亢再重大雨雪水月暈一重在戌不周者期五日有急雨
月暈二重中有黑氣者其國有改政月在房暈左右及兩舍
內黃赤外青白者有急兵亦曰大將以兵叛月暈心四星蟲
為害牛馬多死與金星合其國有兵喪與火星合有大火與
水星合國若有喜月暈尾一四再暈再重者主後宮疾疫月
暈箕歲旱風雨不時月暈斗相國死與歲星合者大臣進秩
賢人在位與火星合者大臣被斥與地民飢與金星合者其
野大水國飢月暈牛將有謀月暈牛與歲星合者其國有喜
慶事與火星合者其分有兵喪與土星合者道路有阻與金
星合者其國大飢民為盜與水星合者其分有水患月暈女

兩軍相當有風則不戰無風則不利先舉者與木星合者后
妃有儲嗣之慶與火星合者從宮有逆謀與金星合者其國
有兵急亦曰后族叛與土星合者女主不務節儉與水星合
者其國女主有陰謀月暈虛內有白氣與如連環相貫者其
國家幸有夏月暈危人多疾病月暈室有壘夷末朝中國月
暈室開口不周者三日暴風雨月暈室與歲星合者其國益
地與火星合者其國有大火與土星合者其國興土工百姓
困為亂兵與水星合者其野有大雨水五穀不成國飢月暈
壁宿內白黑相間外赤青黃紫其下賢臣坐事亦曰忠良被
斥逐月暈奎一重至五重其下有兵憂與歲星合者其國武

事備與火星合者其下武庫有大災與土星合者其野有溝
瀆之事以後事勞民與水星合者其下有大水患江河暴溢
月暈婁宿至五重者其國苑牧犧牲多死傷月暈婁與木星
合者其國君德通于天祭祀以時宗廟以禮與火星合者其
野有兵變亦曰內苑有大災與土星合者其國有大獄事與
金星合者其國兵盡行與水星合者其野衛士有匿謀月暈
胃天倉有起兵其野歲凶有兵喪月暈昂有苑冤獄起又曰
有臣死獄其國兵叛月暈畢一重期三日有風雨與木星合
者人君好畋獵與土星合者其野有失邊與火星合者邊地
有兵火與金星合者邊將為亂一曰外夷內侵與水星合者

有坐法令之臣月暈^背三重出戰先舉者利一曰其野有水有
疾疫與木星合者其國有兵威與火星合者其下有兵喪與
土星合者其國有禁兵作亂與水星合者其野有水患月暈
參水旱為災民飢米貴其下兵起月暈三日有暴風雨月暈
井有暴死陰貴人月暈鬼其國有兵喪一曰民飢流亡月暈
柳主大風雨月暈星宿天都有兵謀庫藏有火起災其國多
憂下民有衣服之僭月暈張宿不周徧者期五日有風雨周
徧其野臣下有憂若暈三重內黑外白則其野有兵月暈翼
宿若一重及兩重不及他星其野人君好樂臣下多誚諛月
暈再重周匝在軫內赤黃外青白者其野有死相一曰輔臣

被誅月暈周軫車騎不備

月旁星占

宋史天文志彗星入月或犯之兵期十二年大饑貫臣叛主
流星犯之有兵入無光有亡國在月上下國將亂

觀象玩占彗孛星入月大兵大饑天下亂月無光其年國亡
入而不出國遂亡出之亡國復立彗孛觸月臣叛主彗孛拂
月兵火起臣專政有逐君死將亡國彗孛出月兵起將死四
夷來侵彗星出月左右不出三年有兵喪大臣倡亂彗觸月
暴兵起客星入月中有兵喪破軍殺將一曰內亂大臣死
又占將軍謀逐客星食月其國相死軍破客星與月同光臣

作威民非其上主令不行兩星夾月近臣謀逆不成受誅衆
星圍月賊入宮二星在月上左右角臣伐君兵亂三年月出
而有星在其背有奸人入城期五日若星在月下者吉有黑
星在月角上臣謀逆在月角下士卒亂星多則有大亂月行
有星圍繞之多至十數其分覆軍有大喪月暈有雙星捧之
色明潤者其國昌月四旁有星環之其國大昌我軍守壁月
有一明星防奸人入壘攻城之際月左有星占上角者城不
攻敵人守壘我軍攻之月下有星相近防有突兵我軍圍敵
壁壘月背有星其城當潰若月背有三星如連珠城不攻而
自破若三星環抱月背則不可攻軍圍敵壘月下三星橫列

者城內詐降宜備之軍行有三星橫列在月上不利進戰宜
固守防潰亂 流星衝月大臣有爭敗黜流火背月光天子
將遣大使之他國流星五色映天奪月光者大使發流星双
貫月宰相為將所殺大兵起公卿受死流星四面一時刺月
大兵起一曰四方有使還其使叛心離上流星入月君憂
失地女主疾月無光兵起四夷入侵中國海中占曰流水入
月中不出其分國亡若星復出則亡國復立天無雲流星過
月上下月光明潔者其國有喜有流星墜日月旁其國先
喪後兵

欽定天文正義卷十二

月食占

月食占

詩小雅彼月而食則惟其常傳曰月食非常也此之日食猶常也

史記天官書月食始日五月者六六月者五五月復六六月者一而五月者凡五百一十三月而復始故月食常也日食為不瘡也甲乙四海之外日月不占而丁江淮海岱也戊己中州河濟也庚辛華山以西壬癸恒山以北日食國君月食將相當之索隱始日謂歷始起之日也依此文計惟有一百二十一月與元數甚為懸校既無太初歷術不可得而推定以漢志三統歷法計則五月者七六月者一又五月者一六

月者五五月者一凡一百三十五月而復始耳或術家各異或傳寫錯謬故此不同無明知也

隋書天文志張衡云對日之衝其大如日日光不照謂之闇虛闇虛逢月則月食值星則星亡今歷家月望行黃道則值闇虛矣值闇虛有表裏深淺故食有南北多少

按月行當日之衝為地所隔日光不照故食張衡闇虛之說蓋地在天中日照其半背生闇影故闇虛必與日衝今名曰月入闇虛則自失其光西術又曰地食日徑大於地地影徑五倍故闇虛成尖圓體下徑如地而上銳圓見前其長第二卷過於月而上不及星故星不為食月天值闇虛之徑約為

月徑三倍

日體大月體小能日遠月近故視徑皆約半度月天所值閏虛之間往則約一年度有半

張

衡謂閏虛之大如日值星則星亡其義猶未密也月道與黃道有兩交日一歲而一周天月一月而與日會故月一歲必兩次交入隋志月望行黃道則值閏虛之說是其入交而不食者或距交稍遠故不食或望時月在地下雖食而不見耳天官書云月食始日五月者六六月者五月復六六月者一而五月者九五百一十三月而復始索隱謂依此文計唯有一百二十一月與元數甚為懸校以漢志三統法計則五月者七六月者一又五月者一六月者五五月者一凡一百三十五月而復始今按天官書文當以

五月者凡五作句或凡字在五字下則與索隱一百二十
一月相合其所謂百一十三月者誤也索隱以三統法計
當是以五月者七六月者五又五月者七六月者五五月
者一則與一百三十五月相合其六月者一之一字乃五
字之誤又五月者一之一字乃七字之誤也以今時憲法
考之月始食自正交始日起算六月者三五月者一六月
者四如是者三周又六月者二五月一六月者七五月者
一六月三凡二百二十三月而復始日月未復正交僅二
十八分餘謂之復始
可也與太初三統法皆不同以月交行度考之當以今法為
是蓋月行交週一周凡十二月而過八度自正交至中交

凡六月而過四度月距交前後十五度以內皆入交故凡
六月者或六或七而五月者一無兩閏五月之理漢天志
嘗有月食非其月者則其法之疎可見也又按日月視徑
皆約半度故日月兩星相距半度以內方見日食又因地
半徑差能視高為下故月在黃道南者多不見食而閭虛
之徑約一度半故月與閭虛兩心相距一度以內即見月
食又無地徑半差無有當食而不見食者故日食不數觀
而月食鮮虛歲故日月食常也其占亦較日食為輕天官
書云月食將相當之以日于占分野其說必有所本而後
世所傳占家之言又各不同今擇其有引據者具于編至

於理數所無與拘牽傳會顯然可見者則附辯於後云

開元占河圖帝覽嬉曰月食所宿國貴人死又曰女主當之
荊州占曰月蝕盡大人憂又曰羅貴又曰豪族滅勢家絕
甘氏曰月行宿歲星而蝕民相食粟石千大司農憂帝覽
嬉曰月犯熒惑暈而食破軍亡地大將有憂甘氏曰月行
宿填星而蝕其國以伐飢亡巫咸占曰月當填星而食其
國有土功之事甘氏占曰月蝕三日有雨事解不占

觀衆玩占月蝕者陽侵陰臣下有咎董仲舒曰月蝕之宿
其國貴人死或曰月蝕則粟貴荊州占曰月食則失刑之國
當其咎又月蝕人主宜嚴號令省刑罰月食後三日內有

大雨則災降乙巳占九月蝕其鄉有拔邑大戰之事凡師
出門而月蝕當其國之野軍大敗將死月食大半以上大
水以日支占國月食而青色人多死五穀傷黃色有立諸
侯國者白色其國有喪或失地其食盡者五穀貴其分國
當之一曰月已食而色青為憂赤為兵黃土功白喪黑水
月食而赤如血有反臣月食而闕且暈有軍必戰無軍
兵起一曰隨所食伐之利月食而有氣從外來入月中主人
不利從中出外客不利氣從南行軍不利北行北軍不利
東西亦如之氣所之方敗也月食而有穠氣蒼色蟲
蝗生大臣災有大水民流亡以日辰占其地月食盡在陽

占在大臣陰日占在妃夫人

管窺輯要月蝕彗芒射入將相穴有兵從射方擊之大
捷月蝕雜氣射入兵亂將凶急防冲彗

月食四時占

觀象玩占月蝕食歲惡將軍死國有憂一曰穀貴夏食
旱一曰國有憂一曰蟲生秋禾不成秋食兵起一曰邊有兵
民不安西方災冬食其國飢有女喪一曰將有憂一曰春多
潦女主憂已上皆以日辰占其野

月食十二月占

開元占帝覽嬉曰十二月月蝕不盡是謂當其數不占荆
州占曰十二月月食吳國受災一曰有流民盡乃以日辰
占其野

觀象玩占武密占曰月正月食有災旱一曰人災齊國惡米
貴二月食貴人病魯國惡畜貴三月食大人憂楚國惡絲
綿貴四月食人飢周國惡按庶徵典引武密占作四月人飢周國惡徙之五月食

旱梁國惡六畜貴六月食旱沛國惡六畜貴七月食兵起
陳國惡絲綿貴八月食兵起鄭國惡魚鹽貴九月食兵起
韓國惡十月食兵起衛國惡十一月食趙國燕國惡十

二月食有大水秦國惡

按十二月占分野惟十月衛國十二月吳國係本建之分
武塞占十二月秦國則係本建之衝二月魯八月鄭國則
係本建之合餘皆無義可尋至河圖帝覽嬉云不盡
不占荊州占云盡乃以日辰占其野雖據十二月為言大
抵亦月食占通例也

月食十干占

史記天官書甲乙四海之外日月不占丙丁江淮海岱也戊
己中州河濟也庚辛華山以西壬癸恒山以北日食國昌月
食將相當之

開元占洛書曰月以丙丁日蝕年飢

觀象玩占月以甲乙日蝕年多魚禾麥傷丙丁日年豐戊己日下田凶庚辛日高田凶壬癸日歲和

按日食以六十花甲占月食止占十干亦曰為輕之意也

月食宿分占

月食在角

觀象玩占月在角食刑罰之臣有當黜者黃帝占曰將吏有憂

天文會通月食在左右角其國執法者有憂若食近左角則左輔有殃食近右角先舉者死大將一曰主將惡之

月食在亢

觀象玩占月在亢食民人疫一曰刑罰之官憂
天文會通
其野君有憂其國大臣有繫獄者

月食在戌

觀象玩占月在戌食石氏曰大臣死後宮多疾病
荊州占曰
治耕之臣有黜者

天文會通公卿大夫有當黜者又曰其地有疾疫一曰糴貴
月食在房

觀象玩占月在房食石氏曰臣專政一曰大臣有黜者
天文會通公卿大夫有當黜者又曰治耕之臣有黜者

月食在心

觀象玩占月在心食石氏曰三公有黜者海中占曰國有兵喪天文會通其下有喪

月食在尾

觀象玩占月在尾食御乘人有黜者甘氏曰后族若御宴有坐法者一曰貴臣犯法

月食在箕

觀象玩占月在箕食大風為災郝萌曰車騎發陳卓曰人相食天文會通御者樂人有當黜者一曰其野車騎滿道路有水旱民飢

月食在斗

觀象玩占月。在斗食。國飢。有小兵。天文錄曰。妃嬪有黜者。一曰。將相有憂。

月食在牛

觀象玩占月。在牛食。其國叛。兵起。天文論曰。其分飢。管窺輯要。津梁塞。牛多疫死。

月食在女

觀象玩占月。在女食。女主憂。天下女工廢。武家占。有兵旱石。氏曰。女主弱。國有憂。

月食在虛

觀象玩占月在庫食都萌曰民飢去其室家一曰有兵戰一
曰典衣服刀劍金玉之臣有坐罪者天文會通其邦有喪
月食在危

觀象玩占月在危食石氏曰宮廟有驚一曰大臣死尚服之
官有黜者天文會通其分有兵喪不崩大臣憂

月食在室

觀象玩占月在室食年飢民絕糧一曰去功興天下乏

月食在壁

觀象玩占月在壁食大臣憂文士執天文會通民多疫

月食在奎

開元占月食奎度中魯國凶一曰邦君不安白衣之會
觀象玩占月在奎蝕大臣憂海中占曰大將有謀邊將有
黜者一曰兵乏糧一曰聚歛之臣有黜者

月食在婁

開元占月在奎婁而食聚歛之臣有黜者
觀象玩占月在婁食民飢一曰有聚歛事
天文會通有寬獄一曰大臣有繫獄者

月食在胃

觀象玩占月在胃食甘氏曰聚歛之臣憂鄰萌曰天下飢一
曰有倉廩賦歛之事 天文會通倉廩有水毀

月食在昴

觀象玩占月昴食邊兵起郝萌曰人飢趙地殃又曰主微臣黜天文論曰門戶之臣有事諸侯有黜者武密占曰將軍死胡不安

月食在畢

觀象玩占月在畢食廿八曰邊使凶一曰邊臣誅京氏曰占有小兵郝萌曰人相食一曰胡人大疫

月食在觜

觀象玩占月在觜食早有臣子被枉殺者一曰貴臣大將有憂一曰主兵之臣當黜一曰刑罰濫

月食在參

觀象玩占月在參食其分大飢臣下有謀天文錄曰兵在外大將死其國憂一曰其分大兵田荒粟貴石氏曰大旱己巳占主兵之臣當黜

月食在井

觀象玩占月在井食大臣有謀五穀傷己巳占水衡五祀之官有憂大臣誅食盡則兵起以日占國

月食在鬼

開元占石氏曰月在井鬼而食主人官五祀之官憂
觀象玩占月在鬼食貴人憂

月食在柳

觀象玩占月。在柳食。大臣有憂。甘氏曰。虞水官黜。都萌曰。人飢。天文會通。御庖當有黜者。

月食在星

開元占。都萌曰。月在七星而食。主道橋門立之。臣有當黜者。觀象玩占。月在星食。冀州大飢。又曰。主祠之官憂黜。

月食在張

觀象玩占。月在張食。大水。魚行人道。都萌曰。其地旱。石氏曰。虞人有黜者。

月食在翼

開元占都萌曰月在翼而食主車駕之臣有黜者
觀象玩占月在翼食北夷有兵文籍壞滅一曰蜚蟲多死
天文會通其野期日有遠人來

月食在軫

觀象玩占月在軫食貴死都萌曰車騎發又曰主車駕之臣
有黜者天文會通不及二分者主大風不為殃五分以上
者臣下被黜亦主大臣有憂

按月食宿分占各以宿分及所屬各星聚義而亦不能盡
合今不可考天文會同云月在軫食不及二分者主風不
為殃五分以上臣下被黜雖據軫宿為言大抵亦月食占通

例
也

欽定天文正義卷十三

五星占

五星占

史記天官書。夫自漢之爲天數者。星則唐都。氣則王朔。占歲則魏鮮。故甘石歷五星法。唯獨熒惑有反逆行。逆行所守。及他星逆行。日月薄蝕。皆以爲占。余觀史記考行事。百年之中。五星無出而不反逆行。反逆行。嘗盛大而變色。日月薄蝕。行南北有時。此其大度也。水火金木填星。此五星者。天之五佐。爲經緯。見伏有時。所過行。贏縮有度。歲星所在。五星皆從而聚於一舍。其下之國。可以義致天下。五星皆從熒惑而聚於一舍。其下之國。可以禮致天下。填星所居。五星皆從而聚於一舍。其下之國。可重致天下。五星皆從太白而聚乎一舍。其下之國。可以

兵從天下居實有得也居虛無得也行勝色色勝位有位勝無位有色勝無色行得盡勝之五星分天之中積於東方中國利積於西方外國用者利五星皆從辰星而聚於一舍其所舍之國可以法致天下

漢書天文志凡五星所聚宿其國王天下從歲以義從熒惑以禮從填以重從太白以兵從辰以法以法者以法致天下也

凡五星歲緩則不行急則過分逆則占熒惑緩則不出急則不入違道則占填緩則不建急則過舍逆則占太白緩則不出急則不入逆則占辰緩則不出急則不入非時則占五星不失行則年穀豐昌

晉書天文志凡五星有色大小不同各依其行而順時應節色變有類凡青皆比參左肩赤比心大星黃比參右肩白比狼星黑比奎大星不失本色而應其四時者吉色害其行凶凡五星所出所行所直之辰其國爲得位得位者歲星以德熒惑有禮填星有福太白兵強辰星陰陽和所行所直之辰順其色而角者勝其色害者敗營室爲清廟歲星廟也心爲明堂熒惑廟也南斗星爲文太室填星廟也亢爲疏廟太白廟也七星爲員官辰星廟也五星行至其廟謹候其命凡五星盈縮失位其精降于地爲人歲星降爲貴臣熒惑降爲童兒歌謠嬉戲填星降爲老人婦女太白降爲壯夫處于林麓辰星降爲婦人吉

凶之應隨其象告 凡五星見伏留行順逆遲速應歷度者為得其行政合于常違歷錯度而失路盈縮者為亂行亂行則為天矢彗孛而有亡國革政兵饑喪亂之禍云 隋書天文志五星為五德之主其行或入黃道裏或出黃道表猶月行有陰陽也其東行曰順西行曰逆順則疾逆則遲通而率之終為東行矣不東不西曰留與日相近而不見曰伏伏與日同度曰合其留行順逆掩合犯陵變色芒角凡其所主皆以時政五常五官五事之得失而見其變水火土三星行遲夜半經天其初皆與日合度而後順行漸遲追日不及晨見東方行去日稍遠朝時近中則留留經旦過中則逆行逆行至夕時近中則又留留而

又順先遲漸速以至於夕伏西方乃更與日合金水二星行速而不經天自始與日合之後行速而先日夕見西方去日前稍遠夕時欲近南方則漸遲遲極則留留而近日則逆行而合日在于日後晨見東方逆極則留留而後遲遲極去日稍遠旦時欲近南方則速行以追日晨伏于東方復與日合此五星合見遲速逆順留行之大經也昏旦者陰陽之大分也南方者太陽之位而天地之經也七曜行至陽位當天之經則虧是留逆而不居焉此天之常道也三星經天二星不經天三天兩地之道也古歷五星並順行秦歷始有金火之逆又甘石並時自有差異漢初測候乃知五星皆有逆行其後相承罕能察至後魏

末清河張子信學藝博通尤精歷數因避葛榮亂隱于海島中
積三十許年專以渾儀測候日月五星差變之數以算步之始
悟日月交道有表裏遲速五星見伏有感召向背言日行在春
分後則遲秋分後則速合朔月在日道裏則日食若在日道外
雖交不虧月望值交則虧不問表裏又月行過木火土金四星
向之則速背之則遲五星行四方列宿各有所好惡所居遇其
好則留多行遲見早過其惡者則留少行速見遲與常數並差
少者差至五度多者差至三十許度其辰星之行見伏尤異晨
應見在雨水後立夏前夕應見在處暑後霜降前者並不見啟
蟄立夏立秋霜降四氣之內晨夕去日前後三十六度內十八

度外有水火土金一星者見無者不見後張胃玄劉孝孫劉焯等依此差度爲定入交食分及五星定見定行與天密會皆古人所未得也

開元占五星各受制而司無道之國故審五星逆順變色留守觀其喜怒變色所加宿之左右前後遠近疏數害尅陰陽及見五氣相賊王者而救之轉禍爲福石氏五星讚曰五星更出司不祥應節守道不爲殃日滿不入其事興過時不出陰謀行以星所守占其方芒角變動非常審察五色別青黃各以事類知其殃

觀象玩占歲星爲穀主熒惑爲旱主填星爲土主太白爲兵主

辰星為水主。凡五星超舍而前為贏退舍而後縮為。一曰失次而
上二三宿曰贏躁急之象也。失次而下二三宿曰縮畏退之
象也。光色潤澤溫和曰喜順慶之象也。光芒奮發威猛曰怒暴
聞之象也。光體震閃明滅曰動不安之象也。光耀外出生鋒曰
芒。一曰五寸以下謂之芒。芒長四出曰角。一曰七寸以上謂之
角。長而偏出曰彗。芒謂之正旗。正旗所指者受殃。戰則順旗所
指擊之勝。凡五星同度曰合。石氏曰：光芒相及曰合。巫咸曰：
相偕曰合。荊州占曰：相去一尺內曰合。同宿曰聚。亦謂之會。一
曰光相逮曰會。郝萌曰：留三日曰會。行而造其中曰入。入宿度
而居曰舍。石氏曰：行度所居曰舍。入此宿曰宿。石氏曰：留二十

日以上曰宿處其所曰居石氏曰依度至而不去曰居不東不
西曰留郝萌曰住不移曰留來其旁而居曰守郝萌曰二十日
以上曰守甘氏曰徘徊不去其度曰守行而侵之曰犯石氏曰
經過其星而光曜侵之曰犯古占七寸以內曰犯未央曰相去
雖五寸而光芒不接爲灾亦輕若相去雖一尺以外而光氣相
射亦以犯占先犯而遂留居之曰犯守東西正當曰中自上而
下壓之曰來自下而上真徃冒之曰陵相衝而止曰觸一曰兩
動直前相抵曰觸一曰行而直前衝之曰觸相陵曰闕甘氏曰
合復離離復合曰闕韋昭曰相擊曰闕行而掩之曰襲行而隨
其後曰從西入東出曰貫相切曰磨周之一匝曰環環之而不

石氏曰去之不去

周曰繞迫而侵之曰薄兩體相着曰薄勾者左去右迴如勾字之狀也己者往而復復而往如己字之形也甘氏曰去而復返曰勾再勾曰己石氏曰東西爲勾南北爲己郝萌曰行如勾字曰勾己字爲己刺者過其旁而光射之也掩者冒而滅之也蝕者侵其邊而漸及其中如蠶食葉之狀也吞者從上直下奄之也戴者頂之於上也同光者二體相合不辨其孰爲彼孰爲此也牝牡者以五行相尅而論夫在陽而妻在陰是謂牝牡相承也月食星者月至而星沒也經天者昏旦出於午地木火土陽星不忌金水陰星經天則為妖也盡見者白日出見與日爭明也

李淳風曰聚者自三星以上爲聚聚者集會之象福集則

吉刑集則凶德先至則吉刑先至則凶從者遲疾次第相及於一處也次序從就之象離者雖同宿共度而南北乖隔不和之象徙者雖同在宿分不相停待離越移避相背之象也舍者經其宿度而行舍其宿而遲也宿者經其舍而過徑去不遲也侵者越理而進以大迫小自上逼下漸漸損害之也陵者以小逼大自小犯上直往陵之也抵者一動一靜而動者直至其所也歷者以次相及而過也經者由其中過而無所犯也貫者直經其中過也五星芒刺殺害之象角者長大於芒興立誅伐之象大者大於常體興建開拓之象小者小於本體亡敗感之象又曰吉星大者吉凶星大者凶吉星小者凶凶星小者吉以分位

斷之逆者違逆之象順者和順之象遲者和緩之象疾者急迫之象福德出則失善之象妖禍入則亂亡之象福入刑出則吉刑入福出則凶合者二星相逮同處一宿之中而順而合則吉乖逆而合則凶一逆一順一遲一疾相逢于一宿之中爲會德會則福興刑會則禍作留者刑禍妖異久住其宿興作勃亂之象守者留住也附近列宿伺察政治而爲妖祥也中者中傷之象乘者駕御壓伏之象凌者陵小辱大之象也觸鬪主攻爭戰犯刺主侵奪傷害掩蝕主兼并吞滅乘陵主脅迫暴橫戴者主有所立星戴月爲死喪貫者兵出入之象凡五星守犯列宿皆爲凶咎若逆行或環繞勾已之則其禍尤大也 凡五星合聚

福德先至者吉刑禍先至者凶其去也刑禍先去者吉福德先去者凶福德者水土也刑禍者火水也一曰福德刑禍皆以所合聚之地言之若在水鄉則水爲福德火鄉土爲福德其福彌深或木在金鄉土入木鄉爲福亦淺又得以次相生乃爲全吉如土先在巳午之地而金水木火相次而從之其禍必大反此者未可言吉四星五星則以此論三星不用此占

按五星占大抵以行爲重色次之位又次之行者其度如遲速順逆之類合聚犯守凌歷鬪食則其行之與他曜相值者也五星各有本色又有四時四方之色芒角則色之發動者也位者所居之舍十二辰二十八宿分屬五行旺相爲實休

因爲虛星家有喜樂廟旺之類是也古歷五星皆順行故遲速逆留皆爲星變漢初測候知五星皆有逆行矣而天文家猶以爲占者蓋亦仍古之說也晉志以五星伏見留行逆順遲速應歷度者爲得其行違歷錯度而失路盈縮者爲亂行蓋知有遲留伏逆而推步尚疏非五星有錯度失路也隋志言五星伏見順逆之節其說皆是其言當天之經逆留不居則非張子信用渾儀測候其言日行春分後遲秋分後速則是其言月行有向背五星有好惡則非今案時憲法日月五星各有小輪其輪心皆循本天順行有常度謂之平行日月五星循輪周亦順行有常度在輪上半周順輪心行則見其

速在輪下半周逆輪心行則見其遲日月輪小而輪心之行度多故有遲速而無留逆五星輪大而輪心之行度少故輪周逆行之度與輪心順行之度等則見其留輪周逆行之度過於輪心順行之度則見其速此七政遲留順逆之大經也五星近日則伏遠日則見在日後則晨見在日前則夕見木火土三星平行皆遲於日自合伏與日同度後日行向前星距日後晨見東方順行至距日九十度晨見南方則留留而漸退積而距日一百八十度則夜半經天夕出於東晨入於西過此則爲夕見積而距日二百七十度夕見南方則又留留而復順速日漸及於星則夕不見而又與日合金水二星

本輪以日爲心自合伏與日同度後星行向前夕見西方順行
至距日極遠則留留而漸退退行漸近於日則夕不見而與
日合逮退行至於日後則晨見東方至距日極遠則又留留
而復順順行漸及於日則晨不見而復與日合木火土三星距
距日前後皆過九十度至一百八十度故經天金水二星距
日前後不過四十五度故不經天此五星伏見順逆之常度
也今七政時憲書按法推步驗諸懸象皆無違失則不可以
變言故叙錄史文而附辯於其後至於合聚犯守陵歷闔食
雖亦常度使然而天文家以相值爲占與日月交食近似若
夫色之喜明而忌暗固三光之常經位之喜旺而惡衰亦五

行之正理雖休咎未必果驗而自成一家之言今採錄以
其舊

五星行色變異占

史記天官書五星色白圜爲喪旱赤圜則中不平爲兵青圜爲
憂水黑圜爲疾多死黃圜則吉赤角犯我城黃角地之爭白角
哭泣之聲青角有兵喪黑角則水意行窮兵之所終五星同色
天下偃兵百姓寧昌春風秋雨冬寒夏暑動搖常以此

開元占黃帝占曰五星逆行變色出入不時則王者宜變俗更
行起毀宗廟立無後賑貧窮恤孤寡寬刑罰賞有功舉名士禮
賢者順天道四時發藏財物虛府庫薄賦歛則日月五星妖孽

虹蜺不爲禍害矣 巫咸曰二十八舍各有國分水旱之灾皆相應故旱之歲其國火星赤水星黑 孝經右秘曰五星冠珥臣下逐

觀象玩占五星之色皆欲其順四時春青夏赤秋白冬黑四季之月黃則吉其於列國也則明勝暗喜勝怒 五星色忽變常其占青爲憂赤爲旱爲爭黃爲喜白爲兵黑爲疾病死喪五星木色白火色黑土色青水色黃其國必敗木爲饑火爲旱火灾土爲土功金爲兵水爲水灾巫咸曰吉凶憂患各以色變言之將有兵金星變將有喪土星變將有饑木星變將有旱火星變將有水水星變 五星守二十八舍各以其色占其禍敗歲星

守木星其色白熒惑守火星其色黑填星守土星其色青太白
守金星其色赤辰星守水星其色黃必敗五星皆出中道天
下太平出陽道則旱出陰道則水中道者兩角之間房之中間
畢之天街南北河戌之間皆是也五星皆逆行臣且謀君五星
並晝見天下別造中國元君諸侯裂土爲王五星與日月爭光
臣與主爭五星變色進退喜怒皆與時氣相應金不可怒於
火之鄉巳午是也木不可怒金之鄉申酉是也水不可怒於土
之鄉辰戌丑未是也火不可怒於水之鄉亥子是也土不可怒
於木之鄉寅卯是也怒者形色猛盛芒角四出也皆爲兵災其
變色之日亦以此占之木爲饑兵火爲旱兵土爲土功兵起地

震金爲兵水爲大水疾疫兵喪五星起怒芒角四達其形未達
是謂戒兵其星形變而銳上小下大狀如拔劍是謂成形不可
後救堅甲利兵以待不祥五星有三角者兵息有五角兵行
多角則戰五星反羽其下國不可久處反羽者光芒上天下
小狀如反羽也郝萌曰五星之常形行即乘芒下大上銳及其
倒行而反芒向下謂之反羽五星起怒陵犯留守列舍察其
守犯審其始留之日觀其時氣相和相賊以決其事視其色變
以知吉凶之情別其光芒所指以知兵起所加之鄉芒多而短
者謀而未成芒少而長者其謀已成其氣專而上行芒從一至
四是謂道極或指東或指西或指南或指北四芒已具其下必

有亡國芒過四以上未可命也

五星守二十八舍其中外官星亦各有五行所屬不相賊害爲吉若有賊害各以其官占其事五星守木星有木異守火星有火異守土星有土異守金星有金異守水星守水異 五星歲守木星熒惑守火星填守土星太白守金星辰星守水星是謂五重守并氣之象也法曰并氣是謂重施過節則民多疾疫五穀不成災害並生一曰天下旱萬物不成 五星歲守土星熒惑守金星填星守水星太白守木星辰星守火星是謂守所勝上克下之象也法曰賊歛重徭役繁下民屈竭莫之能供故下皆惡其上則強凌弱衆暴寡是故盜賊衆多兵革並起 五星

歲守火星熒惑守土星填星守金星太白守水星辰星守木星
是謂母守其子陽不施之象治曰陽氣不足故多水災五穀不
成 五星歲守金星熒惑守水星填星守木星太白守火星辰
星守土星是謂守所不勝下克上之象治曰臣民侵陵其主君
弱臣強主威不振故姦臣賊子有謀上之心 五星歲守水星
熒惑守木星填星守火星太白守土星辰星守金星是謂子守
其母陰氣不成之象法曰陰氣不足故旱多火災萬物不成
五星王則光芒相則光實休則光而無角不動囚則無光芒死
則色微小也五星之變以王時則王者之事以相時則將相大
臣之事以囚時則囚徒之事以休時則萬民之事

五星合關占

史記天官書歲星與太白關其野有破軍 木星與土合為亂
饑主勿用戰敗水則變謀而更事火為旱金為白衣會若木金
在南曰牝牡年穀熟金在北歲偏無火與水合為燂與金合為
鑠為喪皆不可舉事用兵大敗土為喪主孽卿大饑戰敗為北
軍軍困舉事大敗土與水合穰而擁關有覆軍其國不可舉事
出亡地入得地金為疾為內兵亡地三星若合其宿地國外內
有兵與喪改立公王四星合兵喪並起君子憂小人流五星合
是謂易行有德受慶改立大人奄有四方子孫蕃昌無德受殃
若亡五星皆大其事亦大皆小事亦小蚤出者為羸羸者為客

晚出者為縮縮者為主人必有天應見于杓星同舍為合相凌為闢七寸以內必之矣 金木星合光其下戰不合兵雖起而不闢合相毀野有破軍 水繞環太白若與闢大戰客勝

漢書天文志辰與太白合則為變謀為兵憂凡歲熒惑填太白四星與辰星闢皆為戰兵不在外皆為內亂土與水合為雍沮木與金合闢國有內亂 三星若合是謂驚立絕行四星若合是謂大湯

宋史天文志歲星熒惑合闢為饑旱與填星合為內亂民饑又曰野有兵與太白合闢則大將死與辰星合則君臣和填星與熒惑合則為兵為內亂大人忌之與太白合於太微國有大兵

開元占易坤靈圖曰王者有至德之萌則五星若連珠荊州占
曰五星皆聚於一舍填星在其中天下興兵詩緯曰五緯聚房
爲義者受福行惡者亡海中占曰五星合亢爲五穀頻不成考
靈曜曰帝起受終五緯合軫黃帝曰填星與五星俱聚於一舍
而填星亡焉所舍之國亡填星在烏大如狼星而黃天下之兵
雖合其國不亡郝萌曰五星闕相貫抵觸光耀相及有兵大戰
覆軍殺將荊州占曰五星相與合闕及列宿乘凌抵觸磨靡及
入貫刺犯守勾己環繞所在之國皆有兵喪 荊州占曰四星
若合於一舍其國當王有德者繁昌保有宗廟無德者喪 海
中占曰三星合其國外有兵喪人民數改立侯荊州占曰三星合

於一舍其國可復修德者強無德者受殃郝萌曰歲與熒惑太白關殺大將近環之賁之殺邊將一曰火金水俱在斗有戮將若死相在東井内外有兵一曰木金水三星合軫為白衣會

歲星與熒惑合柳歲星色赤兵起黃白五穀傷黑為憂青而角亦有兵起石氏曰熒惑與攝提再合宿相不死出走又曰熒惑與歲星合其國水歲星填星合以合日占其國色蒼為水赤為兵黃為旱白為喪又曰其國孰若主吏死又曰有軍在外戰不勝失地荊州占曰太白居歲星南南國敗居歲星北北國敗又曰木星逢太白曰關有土功歲旱天下大饑先舉兵不勝必受其殃文耀鉤曰填星與火合大旱一曰熒惑與太白合主人兵

不勝。巫咸曰：太白與熒惑鬪，不出其年。兵起。一日：熒惑與太白鬪，多口舌。若戰殺大將。歲饑，熒惑與辰星合，鬪其國內，亂有兵起。其分凶。一日：地侯與太白合，所合之宿國亡。地。一日：填星與太白合，相守為兵饑、疾、疫。一日：澆星與填星合，內亂饑，勿用戰。海中占曰：辰星與填星合在虛中，秋水出。一日：齊國地動。一日：太白與辰星合，太白為主人，辰星為客，則有兵戰，客勝。若辰星環繞太白，大戰，主人偏將死。抵太白，主人大將死。甘氏曰：辰星與太白合，鬪亢旱。

觀象玩占：凡五星之內，二星同宿為合，三星以上為聚。凡聚合之宿，相生則吉，事興；相克則凶，事起。聚則以福德先至為吉，刑

禍先至為凶。福德先去為凶。刑禍先去為吉。一吉一凶。兩事俱發。但當修德以待之而已。五星所聚。其下起兵。若五星聚於一舍而芒角。其中所聚之國亡。五星聚。惟土有芒角者。所舍之國凶。五星相薄。天下分爭。甲兵作。有大戰。相去三尺。破軍殺將。流血滂滂。百姓饑亡。相近愈甚。五星相去三尺以外。七尺之內。相望相守。十日以上。至四十日。天下兩主爭國。期三年。遠七年。有德者勝。五星相聚而皆逆行者。其事逆。臣奪主國。五星聚而闕天下大戰。寇賊並起。民庶流離。四星合。是謂大盜。盜猶滌也。其國兵喪並起。君子憂。小人流。荊州占曰。有德者昌。無德者亡。又曰。四星合。相去三尺以內。留守七日以上。天下兵起。國易。

姓九州謀殺人民大殘 三星合闔天下動木火土合鄰萌曰
在一舍為旱饑有土功一曰國分土相去三尺以內守七日以
上天下兵起五穀大傷人相食火土水合女子為天下害大臣
逆木金土合其國兵起不戰填星色赤黃為旱蒼民疾疫春多
死亡荊州占曰木土金參會同舍相去三尺國有女喪有白衣
會兵起大戰火土金合天下有大謀木火金合殺大兵天下有
兵其分國亡金水土合其國戰不勝亡地火木水合用事者當
之天下開牢大赦 二星合為更改革令其分有兵君憂人愁
歲星熒惑陽也太白辰星陰也陽主中邦陰主外邦陰與陽合
中外連兵陽與陽合兵謀在中國陰與陰合兵謀在外國又曰

相近曰犯其殃大相遠曰合其殃小木與火合為饑為旱一曰相出走一曰大臣匿謀有反者主亡地國有水鄰萌曰火木同舍相去三尺以內相守七日以上其國有反臣五穀傷民不安木火合而相守其國君憂有大赦相守十日以上國貴人作亂木火合火在木北有軍軍戰火在木南偏將戰客軍憂木火合於一舍火在木上名曰子母同光其國大強留之一百日不變色失次其國且以重德致天下木火合於宿之陽母子同鄉其國安合於宿之陰兵起木火合行疾兵從之戰不勝荊州占曰熒惑當出見而近歲星出其北天下有急兵出其南有匿謀在中一曰木土合歲不和有大水其分國不可戰木土合相守十

日天且降禍不義者受其殃木與土合一舍木在下土在上名曰雌雄間客軍大敗主人勝金木同在一舍其分有蝗蟲生木金合相去一尺天下有兵不出四十日必戰星色青東方勝色赤南方勝色黃中央勝色白西方勝色黑北方勝武密曰木金合相去五尺有兵戰三尺有破軍二尺有拔城一尺治兵光芒相接大戰無軍在外則兵大起木金合相去三尺相守七日以上將軍誅死木金合三尺以內七寸以外木出金左有年出金右年饑以合之日占五穀之有無甲乙為麥丙丁為黍戊子為粟庚辛為稻壬癸為豆木金合於東方木在北金在南陰陽和為年豐木金合於西方木在金位其名曰伐其國凶有白衣會

年饑木水合爲其國多水民饑一日水水合爲內亂有軍在外不利先起者若相守七日至四十日人流亡火土合大旱石氏曰火土所合宿國饑戰不勝火土合土在火上名曰逆其國防外兵土在火下各不動名曰子母同光其國得地益強火金合金在火上所在之國且以義致天下一曰金居火上其國用兵金火合金在火左右其國必大敗火金合金火入金光芒中火在南有大旱戰則小將死火在金北爲水火與金合金從火有兵兵罷火從金兵大起火從金而金無光火赤而光所入宿受兵國亡一曰火金合而金起芒角居火上其國用兵戰勝火入金出其陰不有分軍必有他急火水合大旱秋合有兵冬合有喪

火與水合石氏曰在他時為淬在冬為刑剋占占曰水火同行
若不有兵疾疫流行土與金合為疾為喪為內兵國亡地一曰
土金合為水土在金北去之寸寸母子同光其歲大豐民安人
主壽昌金土合土色青春多死喪赤為兵黃旱土與金同出其
分國得地土水合為變謀更事又為旱為有陰謀一曰有兵為
戰其分軍敗將死無兵為內亂一曰若有兵戰則客軍敗水合_金
為兵憂為變謀又為邊兵戰金水俱出西方水居金前相近間
可容劍在西北陰國有兵謀以戰主人勝在西南陽國有兵謀
以戰則客勝太白辰星合在西南南國之事在西北北國之事
正有為中國之事太白先出辰星出太白南潦出太白北旱太

白辰星同出辰星移而南水移而北旱 木與火鬪殺大將其
分不可舉兵一曰兵饑並作荊州占曰不出其年強國易相有
內亂木與金鬪有大兵一曰國有內亂野有破軍又曰其國旱
饑不可舉兵木與土鬪不出其年亡地將軍死之又曰有易相
一曰星色青為喪赤為旱兵白為兵黑為水黃為土功木與水
鬪有軍在外則戰軍不在外為內亂將死火與金鬪其野有破
軍殺將一曰有戰兵不在外而在內大將戰死歲饑火水鬪將
死其野有大水火與土鬪巫咸曰不出其年有亡國荊州占曰
有叛臣作亂兵起一曰王者亡地將軍死之一曰其下有圍邑
土與金鬪期九十日有憂王者亡地一曰有兵喪金與水鬪其

國內兵起軍在外者破大將死一日先起兵者凶若環繞之大
戰甘氏曰金水關其分國旱一日有大戰無兵在外則兵大起
土與水關軍在外則戰有死將無軍為內亂兵起一日水土關
關梁不通